

Uffem Markt werd gedauscht

Om letzde Freidaach geh ich uff de Markt, soll enn Werrsching holle unn habb doch tatsächlich was onnerst geschnappt. Wollde Sie nit enn Werrsching?, hott mich der Monn vom Marktstond gefroocht. Iss dess kooner?, habb ich zurick gefroocht. Na, dess iss Weißkraut. So, habb ich gesaacht, doo sehn Se mol wies iss, wenn ooner oikaafe geht, der sunnst nur vorm volle Deller sitzt.

Doo ruft ooner von hinne: Der waaß noch nit emol, wassen Werrsching iss! Ich dreh mich um unn doo war dess moin ahle Kumpel Schorsch, der hott hinne om Scharfe Eck, also om Fred soine Kadoffelstubb, gestonne unn hott mir zugeguckt unn gelacht.

Ei gute Schorsch, habb ich gesacht, jetzt waaß ichs. Was stehden doo rum, wartsde uffs Kättche?

Ei ja, moont de Schorsch, die iss noch schnell emol in die Appedek, die hotts im Knie unn holt was zum Oireiwe. Awwer ich habb merr grad e paar Gedonke gemacht. Waaßt du, wie so enn Markt funktioniert?

Ich wusst nit wasser wollt: Ei Schorsch, wennde waaßd was de kaafe willst, lässdes oipacke unn gibts dem Monn soi Geld. Ferdich.

De Schorsch zieht e Schnut: Ewe grad weechem Geld. Die Leit doo aus Bauschem hawwe die gonz Woch ferr die Kadoffele unn dess Kraut im Feld geschafft - ich habb nix geschafft unn kann trotzdem ihr Zeich mitnemme. Dess iss doch komisch, odder?

Schorsch, sach ich, du host doch frieher vill geschafft ...

De Schorsch war hartnäckich: Woher waaßen der Monn dess?

Er kam merr schon e bisje dorchennonner vor: Schorsch, dess muss der nit wisse, Hauptsach, du host Geld. Unn du hosd Geld, weilde frieher geschafft host, in die Rentekass oibezahlt host unn weil die Kass dirs Geld jetzt gonz longsom zurickbezahlt.

De Schorsch hott sich om Kopp gekratzt: Hier werd also moi Arweit geeche die von dem Bauer gedauscht?

Ja, sach ich, mettem Umweech iwwers Geld!

Unn nochemol kratzt sich de Schorsch om Kopp: Unn gonz frieher hätt ich villeicht enn Korb geflochte unn hätt den geeche dess Gemies gedauscht. Isses so?

Ich habb genickt: Uffem Markt werd gedauscht: Ware geeche Ware odder Ware geeche Geld. Jetzt hosdes verstonne, gell?

De Schorsch hott um mich erumgeguckt, unn weilers Kättche noch nit gesehe hott, grinsder unn stumpt mich oo: Gedauscht werd hier, ja?

Ja, sach ich, so isses.

De Schorsch guckt sich nochemol gonz vorsichdich um: Gucke mol doo driwwe die zwaa junge Mädcher, die Schwarz unn die Blond. Kennt ich moi Ahl geeche die zwaa Junge oidausche?

Ich habb mettem Kopp gewackelt: Geeches Kättche? Die zwaa dausche? Na, ferrs Kättche kriesde mehr!

Druff de Schorsch: Moonsde? Ei was krieg ich dann mehr?

Ich bin gonz noh zu em gonge unn habbem ins Ohr geflistert:
Ferrs Kättche krieste die zwaa Junge unn noch enn Bong debei.

Doo hawwe dem Schorsch soi Aache gestrahl: Ja? Ei Honnes,
was dann fern Bong?

Doo sach ich gonz laut: Um enn Sasch ze bestelle, du Dollboh-
rer.

Eiern Honnes